

Teniente Henriquez:

Formacion Social ta un bon programa pa hobennan cu kier cambia nan bida



ORANJESTAD(AAN): Dia-bierna mainta e grupo di mayor y familiar orguyoso a ricibi e hobennan cu a logra pasa e prome tres simannan den Marinierskazerne cu exito.

Durante e fase aki e hobennan ta pasa door di un training militar intensivo den mondi, caminda ta siña hopi disciplina pa cu ta bon pa sigui uza den bida. E reto grandi cu e hobennan aki tin nan dilanti ta pa mehora nan perspectiva den bida y asina por aporta positivamente pa nan mes, nan famia y Aruba. Semper e prome tres simannan ta e periodo mas pisa pa e hobennan cu ta keda tres siman den campamento y pa hopi di nan ta e prome biaha cu nan ta leu for di cas pa un periodo asina largo.

“Esnan cu a pasa e tres simannan aki a mostra un disciplina, a demostra cu nan kier tuma un rumbo nobo den nan bida. Formacion Social ta un bon programa pa e hobennan cu kier cambia nan bida,” Teniente Henriquez a

bisa e familiarnan presente. Por a mira riba cara di mayornan, y otro familiarnan presente, con orguyoso nan ta sinti nan mes di nan yiu cu a logra pasa e tres simannan. E hobennan durante e tres simannan cu nan a keda den kazerne, a pasa dos fin di siman den mondi. Tur loke cu nan a siña a worde demostra e mainta aki. Por a mira e paki cuminda y material cu nan ta haya cu mester wanta nan 24 ora. Y con nan mes ta haci esaki. Pero tambe a demostra e tacticanan di camuflahe y con pa recoge tur material den menos cu un minuut. E mayornan a worde splica cu durante e tres simannan aki, e participantenan di e programa Formacion Social a siña percura pa nan mes, laba nan paña y drecha nan cama, pa cual ta encurasha pa nan sigui haci esaki na cas. “Apoya y encurasha e yiu ora cu e mester bolbe kazerne back dialuna mainta 7’or,” tabata e apelacion cu a worde haci na mayornan prome cu a bisa e hobennan “boso por bay cas”. E programa di Formacion Social, un iniciativa di Prome Minister Mike Eman, ta un aña largo durante cual e hoben ta ricibi diferente curso di Enseñansa pa Empleo. Varios di e hobennan cu a finalisa Formacion Social a dicidi pa sigui nan school anochi. E programa sigur ta cubri un necesidad cu Gabinete Mike Eman a mira bou di e hobennan pa saca un man y yuda nan.